

Jut

Naoa itəm Jut tēməte

Nəghatən əkuəkir rəha naoa u Jut

?Pah tēməte naoa u? Jut tēməte naoa u. In pia Jemes ne Iesu.

?Tēməte tatuwin kəm pah? Kitat kotəruru ətuatip məmə Jut tēməte naoa u tatuwin kəm pah. Okəm-naka tēməte tatuwin kəm netəm Isrel itəm kotən nīpahrienən e Iesu Kristo.

?Nəmegəhən tahro nulan nian tēməte? E nian əh, iəgətun eiua min neen kəmotuwin motaliwək ikin pisin pisin min, moatəgətun netəmim. Məto ilat kəmoatəgətun rat ilat, moatən məmə təwir əm məmə netəmim rəha niməfak koatol nolən tərət ərnapin min. Ilat koatən məmə təwir əm o nolən nəhlan, məto-inu nəwīrən rəha Uhgīn in iahgīn, kən okol təsolən nalpinən kəm ilat.

?Tēməte naoa u o naka? Jut tolkeike məmə iəfak min ikin min rafin okotəto məmə nəghatən rəha iəgətun eiua min in tərət, kən in neiuəən əm. Kən tolkeike məmə niməfak otətul əskasik e nəghatən itəm in nīpahrienən.

Jut təmən təwir kəm ilat

¹Io Jut, slef rəha Iesu Kristo, kən io pia Jemes, iatən təwir kəm itəmat u Uhgīn təmaun-in itəmat. Uhgīn Tata tolkeike pik itəmat, kən Iesu Kristo taskəlīm wir itəmat.^a ²Pəs nasəkitunən, ne nəməlinuən, ne nolkeikeən rəha Uhgīn otər marioah e nəmegəhən rəhatəmat.

Nolən min rəha netəm kotəuhlin mēntaalat e Uhgīn

(2 Pita 2:1-17)

³Io min neen, aupən, emolkeike pik məmə ekəte naoa u timnə otəmat o nəghat-inən suatip itəm Uhgīn tatos o nosmegəhən kitat. Məto roiu,

iakatəto məmə ekəike mətə nəghatən u tımənə otəmat muəh nikitəmat məmə onəkotəluagin əskasik o naskəlīmən nəghatən pahrien rəha nahatətəən rəhatat. Uhgīn tēmələhəu-pən nəghatən u e nelmī iəfak mīn nian kitīəh əm, kən kol təsos-ipən mīnən. ⁴Iatən nəhlan mətə-inu netəmim neen kəmotuwa anion e nikitəmat. Kəmətə aupən agin məmə ilat okotos nalpīnən. Ilat koatəht nəwīa Uhgīn, kən motəuhlin suatīp rəha nəwīrən rəha Uhgīn moatən məmə tategəhan-in nakləh-inən pətan. Kən kəmotəuhlin mənəaalat e Iesu Kristo itəm in pīsīn əm in Kig ne Iəgəmərə rəhatat.^b

⁵Nəghatən u, nəkotitun rəkis ilat rafin, mətə ekolkeike məmə ekən mau kit mīn kəm itəmat məmə Iəgəmərə təmosmegəh rəhan netəmim motiet Ijip, mətə uarisig təmərəkīn ilat u itəm kəsotahatətəən lan.^c ⁶Kən otətəlig-in-tu nagelo mīn itəm kəmotəmkarəpən-in nepətən rəhalat, mətə kəmotapəs ikīn ətuatīp rəhalat. Uhgīn təməlis ilat e sen itəm okol təsītəgītən nian kit, kən mahtosig-in ilat e napīnəpən mətəarus-pa Nian Asol itəm otakīl ilat lan, kən mol nalpīnən kəm ilat.^d ⁷Kən tahmen əm e Sotom ne Komora ne taon mīn tītəlau elau. Netəmim ikīn mīn əh kəmotapəs nolən ətuatīp motuwīn e nolən rəha nakləh-inən pətan ne nolən rəha nəman koatit atīp ilat mīn ne nīpitan koatit atīp ilat mīn. Kən Uhgīn təmōl nalpīnən kəm ilat e nīgəm itəm okol təsəpīsən nian kit ne, məmə netəmim okotəplan noan rəha nolən rat mīn əh.^e

⁸Nat əpnarīn netəmim mīn əh kīnotitun natīmnat mīn əh, mətə e nolən kitīəh əm, ilat koatən məmə kəmotəplan nat kit tahmen e napīlaiirən itəm təmegəhan-in nolən rat mīn rəhalat, kən tol nəhlan kotən məmə təwīr əm məmə koatol nolən tərət e nīpətīlat moatuwīn əm nulan, kən koatapəs nəgəmərəən rafin, kən koatən rat nagelo mīn itəm ilis pīk.

⁹Mətə Mikael, nat əpnarīn in etəm-iasol rəha nagelo mīn, təməsōlən nəhlan nian in ne Setan kəmatuərgəhəu o nīpətī Moses. Təməsəhaiən Setan məsətu-pənən nəghatən kit lan, mətə təmən əm məmə, “!Pəs Iəgəmərə otən rəham nalpīnən!”^f ¹⁰Mətə netəm mīn əh koatən rat natīmnat itəm kotəruru. Kən e nolən rəha nat megəh mīn, ilat koatol natīmnat mīn itəm nīpətīlat tolkeike məmə otol, kən nolən əh tatərəkīn ilat.^g

¹¹!Kəsi, nahməən asol otuwa olat! Ilat koatətəu-pən suatīp itəm nəti Atam u Ken təmətəu-pən. Kən ilat kīnotos-ipən rafin nīkīlat e nolən rat itəm Palam təmōl aupən mətə-inu in tolkeike pīk mənī. Kən ilat kəmotol nolən rəha Kora moatəht nəwīa netəm-iasol mīn, kən e nolən kitīəh əm itəm Uhgīn təmərəkīn Korah ne rəhan mīn, Uhgīn otərəkīn ilat.^h

b 1:4 Kal 2:4; 2 Pita 2:1 **c** 1:5 Eks 12:51; Nam 14:29-30 **d** 1:6 2 Pita 2:4

e 1:7 Jen 19:1-25; 2 Pita 2:6,10 **f** 1:9 Dan 10:13,21; 12:1; Sek 3:2; 2 Pita 2:11; Nol

Əpən 12:7 **g** 1:10 2 Pita 2:12 **h** 1:11 Jen 4:7-8; Nam 16:1-35; 2 Pita 2:15; 1 Jon 3:12

¹²Nian nakoatol lafet wir min mato-inu itamat nakotolkeike itamat min, kən ilat kotuwa motagwən pik əpnapin əm itamat min ilat, nīkilat təsəhtən netəmim neen, mato ilat kotahmen e nīmas kit əpəh ihluə itəm tatəhluəig itəhəi itəm nego titun nīləs pikənən kən məhap. Ilat netəm kəsotehmən sipsip min, mato koatun pik əm sipsip. Ilat kotahmen e mal napuə itəm nīmətag təmīləs muwa, mato okol nuhuən təsəfikən. Ilat kotahmen e nig min itəm tinuwa e nian ətuatip rəhalat məmə okotoe, mato kəsotoeən, kən in tahmen əm məmə kəmotimīs, kən netəmim kotiuw-pər ilat kən kotimīs agin.ⁱ ¹³Ilat kotahmen e pəau-peau min itəhəi itəm kotorasilin motəruən əpnapin əm, kən koatol-arəp nolən rat rəha naulisən e rəhalat nəmegəhən məmə netəmim rafin koatəplan. Ilat kotahmen e məhau min itəm kəmotakiəh e suatip ətuatip rəhalat. Tol nəhlan, Uhgīn tətəskəlīm iməlat ikin əpəh e napinəpən itəm nəghagən tikə agin ikin.

¹⁴Suah u Inok u aupən, in noanol itəm tatol sepīn lan e noanol min rəha Atam, təmən-iarəp nəghatən rəha Uhgīn itəm təmos-ipən kəm in məmə, “Otəplan-tu, Iərəməərə tatuwa ilat rəhan nagelo min tərət tərət taprəkis,^j ¹⁵tatuwa məmə otakil netəmim rafin, kən otən-iarəp nalpīnən rəha netəm rafin min u itəm koatəht nəwian. In otol nalpīnən mato-inu kəmotol nolən rat min e nolən tərət pik, kən iol təfagə min əh kəmotərakīn nəghatən min itəm tərət kəm Uhgīn.”

¹⁶Nian rafin, netəm min əh kəmoatəghat-əghat kəm ilat min məmə nīkilat təsəgienən o natimnat, kən moatən rat natimnat rafin. Ilat koatətəu-pən atip nətəlīgən rat e nīkilat itəm ilat atip kotolkeike məmə okotol, kən motəghat ausit elat min, kən koatəghat nəghatən tətəhen məmə okotol netəmim okotətəu-pən rəhalat nətəlīgən.

Nəghatən o nəhgaiirən elat

¹⁷Mato rəhak min netəmim, nīkitəmat tatəht nat naka aposol min rəha rəhatat Iərəməərə Iesu Kristo kəmotən aupən, məmə otuwa. ¹⁸Kəmotən kəm itəmat məmə, “E nian itəm namnun nian tatuwa iuəhkīr, netəmim itəm koatəghat ausit moatən rat natimnat rafin, ilat okotətəu-pən atip əm rəhalat nətəlīgən rat e nīkilat itəm ilat atip kotolkeike məmə okotol.”^k ¹⁹Inu netəmim itəm okotəhap itəmat. Ilat kotətəu-pən atip əm rəhalat nətəlīgən rəha nətueintən, kən Narmīn Rəha Uhgīn tikə elat.

²⁰Mato itəmat, rəhak min netəmim, otol itəmat motəsənən e rəhatəmat nahatətəən itəm tətuatip wir, itəm təmisi-pən o Uhgīn. Kən otəghat kəm Uhgīn e Narmīn Rəhan.^l ²¹Kən motos nolkeikeən rəha Uhgīn tətətig otəmat nian nakoatəsahgīn nasəkītunən rəha Iərəməərə Iesu Kristo məmə in otos itəmat nakotuwin e nəmegəhən līlīn.

²²Otasakitun netəm min u itəm rəhalat nətəligən təsətulən ləmətai kitiah. ²³Motəmki-rəkis netəm kotatig iuəhkir o nigəm motosmegəh ilat. Otasakitun neen min, mətə nəkotəgin pīk nolən rat min rəhalat, itəm koatol nəmegəhən rafin rəhalat tamkimik muwīn mek min nīməhan rəhalat.^m

Nəfakən o nənwiwiən Uhgīn

²⁴Pəs kotənwiwi Uhgīn itəm in titun naskəlīmən itəmat məmə okol nəsotəmeən, kən titun nolən itəmat məmə nəme təfagə rat tikə agin e nəmegəhən rəhatəmat, nian otos itəmat nakotuwin e nəhag-əhagən rəha nigənəmtin, kən nikitəmat tagien pīk agin ikin əh. ²⁵Uhgīn kitiah əm, kən in Iosmegəh rəhatat e Iesu Kristo rəhatat Iərəməərə. Pəs kotən məmə nənwiwiən, ne nepətən, ne nəsənənən, ne nərəməərəən rafin agin, in rəha Uhgīn, aupən agin mətəarus-pa u-roiu, matuwīn namnun tikə. !Əwəh!ⁿ